



# Tir Yimiyim

www.tiryimiyim.in

Regd. No. RNI. NAGAAO/2004/13113. Postal-NE/RN-717.

e-mail : tiryimiyim@gmail.com

TAPAK 3

Yangia anidakangma :



Tir Yimiyim



tir\_yimiyim



tir yimiyim

TAPAK 7

Election sülen ang NDA teloktepi Bihar CM shimtsü

Putin den Hungary nung ajuruteptsü



VOL. XXIII ISSUE NO. 11 (ADOK 11) DIMAPUR KÜPTOKNÜ (SATURDAY) MONGPUTENI (OCTOBER) 18, 2025 ₹ 5.00

## Centre-i NSCN-K asadangtsü atema special tribunal ka tentet

**Guwahati, October 17, 2025**

**(Agencies):** Centre sorkari National Socialist Council of Nagaland (Khaplang) noktanga aliba meyipa repringshitsü atema special tribunal ka tentetogo.

India sorkari NSCN (Khaplang) ya anti-terror laws kübok unlawful association ta züngoka lir.

Ministry of Home Affairs-i October 17, 2025 nü sangdong ka nung Gauhati High Court nung judge Justice Nelson Sailoi anir "The Unlawful Activities (Prevention) Tribunal" tentetba osang metetdaksü.

Iba tribunal ajanga National Socialist Council of Nagaland (Khaplang) [NSCN (K)] aser parnok den sendaktepba teloktem Unlawful Association ta

ashitsüsa kulitem lir mali asadangtsü.

Unlawful Activities (Prevention) Act, 1967 ajanga tashitem agütsüba nung ajemdaker sorkari national security aser public order atema lendong keta lir ta ser teloktem mokdangar.

Nagaland aser temeket nung NSCN-K ya telungpur telok tongtipang ka lir. Iba telok ya parnok tanishir asür SS Khaplang tenüing nung aja.

Tribunal-i bushitetba osangtem nung ajemdaker NSCN(K) nem formal ban agütsütsü asü masü jangjatsü. Iba tenokdangba ya ngura iba telok nung züngsemba, yariba, mesüra yaritepbaji ozüing alema inyakba mapa ka ta züngshitsü.

## Nagaland nung Sansad Khel Mahotsav 2025 ayongzüksü

**Dimapur, October 17, 2025**

**(TYO):** Fit India Movement alizüing den putepa Member of Parliament (Rajya Sabha), Nagaland office-i District Administration tem den külemi Sansad Khel Mahotsav 2025 ayongzüksü.

Iba sentong ya October 29, 2025 nungi tenzüka Nagaland kübok district ajak nung agitsü.

MP S. Phangnon Konyak-i lanurtem tashi itdaksütsü aser Nagaland nung saisapongba sobaliba ajungkettsü tenangzükba aliba iba mapa ajanga sayur, ta Press Secretary to Rajya Sabha MP Tenyebinlo Himb-i ashi.

Sansad Khel Mahotsav ya teküpoktiba jenjang nungi saisapongtertem jangjatsü aser anitettsü nükjidong nung agir.

Iba ajanga lanurtem tashi angatsü, külemi yariteptsü aser merangtsü tangatetbatem agütsütsü atema ayongzüka agir.

MP Phangnon-i Nagaland nung lanurtem asoshi lenmang balala lapoktsünür. Iba sabang ajanga lai saisapongbaren ya tetoktepba ka dang masü saka telongjem adokdaksüba, temang anema aliba aser tasü itshiba wadang ka ta lanurtem ajungmesonür ta Press Secretary Himb-isa metetdaksü.

Tejangrartemi www.sansadkhelmahotsav.in nung register asütsü ayongzüker aser osang metetnürtemi +91 70055 22129/+91 96125 23278 ajanga Office of the Member of Parliament (Rajya Sabha), Nagaland den tongteptsü mepishir ta paisa ashi.

## Top 50 Tourist Destinations nung Dzukou Valley adentsü akok

**Dimapur, October 17, 2025**

**(TYO):** India nung "Development of 50 Tourist Destinations of Global Standards" initiative nung Nagaland nunga Dzukou Valley dendaksütsü atema state sorkari shidangogo.

Nagaland sorkari benokba onük nung Rs 250 crore endoka Dzukou Valley ya internasional jenjang nung eco-tourism destination ka kümdaksütsü shia lir.

Iba mapatong nung eco-friendly luxury hotel ka aser tourist facilities yanglutsü, aser visitor experience atema supporting infrastructure yangluloktsü dena lir. October 14 aser 15 anogotem

Udaipur nung Conference of State Tourism Ministers nung 50 world-class tourist destinations renloktsü teletetba agi.

Iba mapa ya Ministry of Tourism, Government of India ajanga len anir inyaktsü aser national challenge initiative ka asütsü.

Nagaland tenüing nungi Tourism & Higher Education Minister Temjen Imna Along-i anir Secretary aser Director Tourism nung iba mungdang nung aden.

Nagaland nung Tsüngremi kangsa tobur junga yangluba maitsüji Dzukou lir aser iba ya alimai angutsüla ta Minister Along-i mungdang nung jembidang ashi.

## Shisa maka lennirtemi ano inyaksaogo: NPCC

**Dimapur, October 17, 2025**

**(TYO):** Nationalist Democratic Progressive Party (NDPP)-i aniba People's Democratic Alliance (PDA) sorkar nung Naga People's Front (NPF) adenba ya shisa maka tanishirtem teloktemi maneni inyaksaoba mapa ka lir ta Nagaland Pradesh Congress Committee (NPCC)-i ashi.

Parnoki tesüiba küm 23 tsüingda inyaktetbaji mapang shia party melenshiba aser tashi aginüba mechi khen dang masü saka political party tasentem tenzüka lir ta Communications Department, NPCC-i sangdong ka nung ashi.

NPF-i PDA sorkar nung

adenba tetezüji Nagaland nung ano maneni opposition maliba sorkar kati ketdangsüba tenüing tamajung angur. Opposition nung tasü itta noktaksü aser nübertem tenüing nung ola adoktsü MLA ka danga mali ta parnoki metetdaksü.

Talisa iba mapa ya yimjung maparen nung yariteptsü atema lir ta tenüing agiba atema aoksar ta NPCC-isa ashi.

Chief Minister Dr. Neiphiu Rio-i küm metsür asem tejakdang sorkar akümba sülen ita asem tsüingda "Naga Political Solution" ka agütsütsü ta nangzükba Nagaland nung alirtemi bilemteter. Pa aser pa den

yaritepertemi ano maneni iba tenüing amshia inyakaka takok mangutsü kechiyong Nagaland nung alirtemi atetpoka angur ta NPCC-i metetdaksü.

Nagaland nung alirtem küm metsür asem tashi tashimait, ochimashi aser tamakok sorkar ka kübok timtema liyonga arur ta parnokisa ashi.

NDPP, NPF mesüra parnok loktepbaji party ajanga sorkar aniaka, mapabo kasa dang asütsü aser ochimashi pusemba sorkarsa asütsü. Maneni, parnoki Centre aser State nung BJP-i telemsa adokdaksüba policy tem maneni pusema nungitsü aser yariteptsü ta NPCC-isa metetdaksüo.

## Assam NHIDCL ken o nung CBI-i Rs 2.6 crore den rongsen aika ngutetogo

**New Delhi, October 17, 2025**

**(Agencies):** Hokolbarnü Central Bureau of Investigation (CBI)-i National Highways & Infrastructure Development Corporation Ltd (NHIDCL) office tem aser executive director Maisnam Riten Kumar Singh'er kiojentem mita aodang Rs 2.62 crore ngutetogo.

NHIDCL ya Ministry of Road Transport and Highways kübok Public Sector Undertakings (PSU) ka lir.

Guwahati, Ghaziabad aser Imphal nung mita aodang Maisnam Riten Kumar Singh aser par kinungertem tenüing

nung investments asüba kulikakettem ngutetogo. Item rongnung Delhi-NCR nung apartment units 9, office space ka aser residential plots asem aser ano Bengaluru nung apartment ka aser residential plot ka dena lir ta CBI-i ashi.

Guwahati nunga apartments 4 aser residential plots 2 indang kulikakettem nguogo. Iba dak alia Imphal West nung homestead plots 2 aser agricultural land parcel ka lir. CBI-isa jenjang aika alangba gari 6, luxury watches 2 aser silver bars ngutetogo.

"Kiojen aser ali kimung

teimbaka Singh aser par kinungertem tenüing nung lir aser itemji jangjatepdar" ta CBI-isa ashi.

Osang tejangja angazükba sülen CBI-i Singh aser nija company nung inyaker nisung 2 anema ken o benok.

Nija company kati mapa inyakba atema Extension of Time (EOT) aser Completion Certificate agütsütsü atema Singh-i Rs 10 lakh süpokrem meshia agidang CBI-i pa apu.

Iba ya Demow aser Moran bypass tatemlen tsüingda NH-37 four-laning dak sendakba contract atema liasü.

## Assam nung Anti-Quackery Cell-i taila doctor 22 puogo

**Guwahati, October 17, 2025**

**(Agencies):** Assam nung takü Anti-Quackery & Vigilance Cell tentetba sülen ketdangsürtemi medical professionals jilu benshir nisung 22 tashi puogo.

"Assam nung taila doctor aika lir aser nisung asürtem rongnung 11.01% tashi item amala unlicensed practitioners nem anepaludaksüba liasü" ta Anti-Quackery & Vigilance Officer,

Dr. Abhijit Neog-i ashi.

"Kuli tejangja mebushiba, osang mesangoktsüba aser inyakyim shitak lateta maliba ajanga taila doctor tem kanga bulua adoker" ta Dr. Neog-i ashi.

Nisungtemi taila doctor tem indang osang kong sangoktsütsüar memetet. Nübertemi district-level health ketdangsürtem aser talisa Health Services nung Joint Director temi

Clinical Establishments Act (CEA) mapa meinyakba atema aitsür.

"Nagaon nung taila doctor kati local health office nungi clinic ka lapoktsü temelaba angu. Iba doctor dak nüngdakba qualifications meliaka CEA kübok specialties pungu agüja clinic lapoktsü temelaba agütsü" ta Dr. Neog-isa ashi.

(Maneni tapak 8 nung...)

## AP nung telungpurtemi Assam Rifles teseppamak

**Guwahati, October 17, 2025**

**(Agencies):** United Liberation Front of Asom (Independent) [ULFA (I)] aser National Socialist Council of Nagaland (NSCN K-Yung Aung) züngsemtem ta temulung melemi bilemertemi Brihostibarnü Arunachal Pradesh nung Assam Rifles teseppamak.

Yashinep 2:30 ako aser 3:30 ako meta Changlang district kübok Hatman village anasa iba ya atalok. Parnoki Assam Rifles tesepp nung injang aika khaloktsü.

Iba lendong nung Assam Rifles personnel pezü yiruba helicopters ajanga anepalutsü anir ao. Osang angazükba agi telungpur 45 shi kati iba mapa inyak.

India-Myanmar arrtsülen tensa mejungi akümba mapang ka iba ya atalokogo.

Myanmar nung Nagaland aser Arunachal Pradesh den arrtsüa aliba tesepp nung Indian security forces-i tayimtsü amshia July 15 nü amak ta ULFA (I)-i ashi.

Iba mapa ya July 13 nungi

tenzüker aser Israeli o French nung meyong drones 150 tema amshi ta ULFA (I)-isa ashi.

Iba mapang ULFA (I) tanishir asem tepset aser 19 yirutsü.

ULFA (I) aser NSCN (K-YA) teloktemi August 15 nü India Independence Day benjungmong mokdangtsü ayongzüka liasü.

Parnoki külem sangdong ka agütsüba nung Assam, Arunachal Pradesh, Manipur, aser Nagaland nung alirtemi lungkak aitha sayua kilung nung dang amungtsü ayongzüka liasü.

# Imna Imchen-i züluba kaket ka sayaogo



**Dimapur, Mongputeni/Oct. 17 (TYO):** Imna Imchen-i züluba 'Indigenizing Faith: A Study on Prayer Center Movement in Nagaland' kaket October 17, 2025 nü Dr. Bendangjungshi, Principal, Discipleship Bible College, Dimapur ajanga sayatsüogo.

Iba kaket yagi nisung meimchir indang asadanga aser akhi mapang atalokba bushia arogo indang mission mapa nung kongshia Nagaland nung prayer centers ainba nung socio-cultural, political, tamangba yimsü aser puti otsütem bushisüngdanga indang sayur, ta pai ashi.

Dr. Panger Kichu ajanga iba kaket asadanga indang lemsatepdang, prayer centers nung tajung aser tashi mait lir, saka Naga nung tanüla tsütsü tiyongtsü ka ama lir, ta ashi.

Prayer centers tem nung

laishiba tesayuba ajema aliba repringshitsü nüngdakba aser taneptsü, teimla aser tanüla tsütsü mera tasen nüngdaker nem teyari agüja tang arogo balalai magütsütetba tanüla chiyongtsü tem agütsütsü indang pai ashi.

Pai kaket azüngertem dang, asenok asoshi tetsükdaktsüji kati ka aija mesüra anema nokdaktsüba indang masü saka alima nung Tsüngrem sülen anidaker züina aotsü asoshi külemi inyaktsü aser kati ka nem tenüngsang agütsütsü asoshi Tsüngrem nungi shisatsü bushitsüla, ta ashi.

Kaket menünger Dr. Lanusangla-i tesüba küm 20 tsüngta prayer centers tali akumba aser prayer centers temi 'traditional Naga churches' aser yangji züngsemtem asendenshitsuiba indang lemsatepa liasü.

Iba kaket ya prayer centers nung aser prayer centers ajanga Khristan yimsü amshia nüburtem atsür aruba aser amshiba yimyatem angatetsü asoshi 'anthropological' aser 'missiological reflection' atema okila amai lir, ta kaket zülur Dr. Imna Imchen-i ashi.

Iba kaket yagi 'primal religious dynamics and religious framework' angatetsü mechi tamangba yimsü mezüng amshi tenzükdang tamangba yimsü inyakyim indang ashir. Ano iba kaket yagi Nagaland nung Khristan yimsü renloka aoba otsü nunga rangloker, ta ashi.

Dr. Imna Imchen ya Disciple Bible College, Dimapur nung Associate Professor, Mission Studies and Cultural Anthropology aser Cornerstone Ministries indang director lir.

# Yingli College nung national seminar ayongzük

**Dimapur, Mongputeni/Oct. 17 (TYO):** Directorate of Higher Education, State Level Quality Assurance Cell (SLQAC), Nagaland ajanga sponsor süa October 16, 2025 nü Borgohain Hall Yingli College, Longleng nung 'Tribal Culture and Identity in India' indang National Seminar ka ayongzüka liasü, kong tongti o jembir Dr. Parag D. Parobo, Associate Professor, Department of History, Goa University liasü.

Principal, Yingli College, Dr. T. Temsu Imti ajanga sentong nung pela agizükba o jembidang sobaliba wazüka ayutsü

tongtipang ta angatetdakja liasü. Pai kaketshirtem dang iba maongka amshitsü ajungshi aser kaketshir temi sobaliba angazüka aser wazü ayutsü kanga tongtipang lir ta ashi. Dr. Imti ajangasa Department of Higher Education dang pelaba lemsatepa liasü.

Mezüng sentong nung Dr. Kekhriengulieu Tachu, Assistant Professor, Department of English menden liasü aser College Anthem tena sentong tenzüker aser Phenmei B Phom, Assistant Professor, Department of Sociology ajanga sarasadamba sülen BA 1st Semester kaketshir temi

sobaliba ken ka aten.

Dr. A Rahman, Associate Professor, Department of History ajanga iba sentong ayongzükba nükjidong lemsatepa liasü aser tongti o jembiri online ajanga tribal nisungtem sobaliba aser maittsütem indang jembia liasü.

Vice Principal, Dr. B Henshet Phom ajanga melepzüng o jembia mezüng sentong tembang aser tanabuba academic sessions nung "The Phom Nagas' Culture, Oral Narratives, and Identity" aser "Transition from Tradition to Modernity and Cultural Continuities" onük nung ajemdaker agia liasü.



Dimapur Govt College Alumni Association purtemi Dimapur Govt College nung azünger kaketshirtem rongnung makamait kibongtem nungi arur kaketshirtem kar shimteta küm shia "Alumni Scholarship" agütsür. Taküm 2025 küm agi tasembuba "Alumni Scholarship" agütsüba sentong ka College Seminar hall nung October 16, 2025 nü agiba mapang iba teyari angur kaketshirtem den külemi agiba noksa ka yangi angur. Taküm iba Alumni Scholarship ya kaketshir parnok tenet nem agütsüogo. Iba scholarship ya Alumni rongnungi kijai kar nem agütsür aser kar nembo telok senpong nungi agütsür. ( Dimapur , October 16, 2025)

# NPF CEC ajungben senden ayonger

**Dimapur, Mongputeni/Oct. 17 (TYO):** Party Constitution indang Article balala kübok tashi agüja aliba amshia Naga People's Front (NPF) tir ajanga Central Executive Council (CEC) ajungben senden ka October 18, 2025

nikongdang 1:30 ako nungi NPF Central Office, Kohima nung jateper, ta sangdong ka ajanga ashi. Anungji CEC züngsem ajak iba senden nung arua adentsü metetdaksür, ta sangdong ajangasa ashi.

# Dimapur nung PM SHRI school tem asoshi workshop tenzüko

**Dimapur, Mongputeni/Oct. 17 (TYO):** Nagaland nung PM SHRI school pezü nungi kaketshirtem atema "World of Work" (WoW) indang anogo ana workshop sentong October 16, 2025 nü Kuda Youth Hall, Dimapur nung tenzüko.

Iba sentong ya Ministry of Education, Government of India kübok PARAKH (Performance Assessment, Review, and Analysis of Knowledge for Holistic Development), NCERT, New Delhi ajanga Samagra Shiksha Nagaland aser SCERT Nagaland den lungjemer ayongzükba lir.

Ibai National Education Policy (NEP) 2020 nükjidong aser talisa skill development, vocational exposure aser experiential learning temaba jenjangi ajungkettsü atema tongtipang mera ka lir.

Nagaland nung PM SHRI GHSS Chumukedima, PM SHRI GHS Naharbari, PM SHRI GHS Burma Camp, aser PM SHRI GHS Thahekhu nungi iba workshop nung shilem agitar.

Ministry of Skill Development and Entrepreneurship (MSDE) ajanga asadanga job sectors 36 kübok career lenmang balala nung kaketshir nem shisatsü agütsütsü aser ano Artificial Intelligence (AI), green technologies, aser creative industries amala nung teimla aliba indang angatetdaksütsü meranga iba sentong ya ayongzük.

Dr. Chumbeni Kikon, Joint

Mission Director, Samagra Shiksha Nagaland ajanga iba workshop ayongzükba nükjidong rateta jembidang early vocational orientation ajanga lanurtem nem tashi agütsütsü nüngdakba aser 21st-century skill-building indang ashi.

WoW ama sentong ajanga kaket reju tem 'traditional academics' alema odaktsüba aser kaketshirtem tarutsü careers shimtsü atema angatetdaksüba indang lai rasaa ashi.

Prof. Indrani Bhaduri, Head and CEO, PARAKH, NCERT, New Delhi ajanga video message ka lemsatepba mapang skill-based learning, vocational education aser experiential assessments tem schooling nung lungjemdakja amshitsü nüngdakba indang ashi.

Lai tesayur aser school nung tanishirtem dang shisaliok aser mapa sendaktepba 'hands-on learning, internships, aser project-based experiences' indang maongka agütsütsü ajungmesoa liasü.

Shisalen sayur Elangbam Ashakiran Chanu aser Kavita Ghosh nati iba workshop nung 'vocational pedagogy' aser lanur terenlok indang onük nungi jembia liasü.

Iba workshop tenzüka sentong nung Samagra Shiksha Nagaland, Department of School Education (DoSE), SCERT, NBSE nungi ketdangsurtem aser PM SHRI school pezü nungi tekolak tem dena liasü.

# Longleng nung CM-MOT camp agitsü

**Dimapur, Mongputeni/Oct. 17 (TYO):** Deputy Commissioner Longleng, W. Manpai Phom ajanga sangdong ka nung, District Hospital Longleng nung Chief Minister's Mobile Operation Theatre (CM-MOT) camp ka October 21 & 22, 2025 anogotem anepdang 9:00 ako nungi tenzüksü, ta metetdaksü. MLA Dr. Tseilhoutou Rhutso-i anir specialist doctor tem iba sentong nung shilem agitsü.

Iba Mobile Operation Theatre nükjidong ya meta talang nung aliba tesemtem nung surgery tila aser danga diagnostic service tem hadir teperi aliba mobile surgical unit ajanga specialized health care service agütsütsü asoshi lir.

Iba camp nungya General surgery, ENT, Obstetrics & Gynaecology, Dental aser Orthopaedic amala services tem agütsütsü.

Deputy Commissioner ajanga jangra aliba nübur ajunga dang iba maongka agitsü ayongzük. Registration ya jelia District Hospital Longleng nung mapa inyakba anogo mashi nung nüngdakba ID proofs (PMJAY/CMHIS cards densema) bener arua agitettsü.

Osang tejangja metettsü atema nüburtemi Dr. Joshua DH Longleng mobile No. 8798438792 aser Dr. Theja DH, Longleng mobile No. 9612860432 den tongtepratep sütettsü, ta sangdong ajangasa ashi.



October 17, 2025 nü Chief Election Commissioner (CEC) Gyanesh Kumar den Election Commissioner ana- Sukhbir Singh Sandhu aser Vivek Joshi nungeri Bihar assembly election dak sendakba nung sepai aser police tongti ketdangserem den senden amendang tangokba noksa nung angur.

### Election sülen ang NDA teloktepi Bihar CM shimtsü: Amit Shah

**New Delhi, October 17 (Agencies):** Union Home Minister Amit Shah-i, Bihar nung NDA teloktep nung mangatetep mali, aser taruba election nung NDA-i Chief Minister Nitish Kumar lenisüba nung tokteptsü, ta metetdaksü. Osangbener den jembidang Shah-i, election agiba sülen ang BJP aser NDA teloktepi chief minister candidate shimtsü, ta metetdaksü. November 14 nü election osang sangdongba mapang nung NDA-i tamalen takok

anguba record ajak ajatettsü, ta paisa metetdaksü. "Nitish Kumar ji Chief Minister asütsü asü masüsiar ni telemtetba agütsü makok. Tang atemabo onoki Nitish Kumar lenisüba nung tokteper. Election agiba sülen teloktep nung dena alirtem ajaki lenir shimtsü," ta pai metetdaksü. "2020 küm taoba election nung Nitish Kumar-i Ato kilonser Narendra Modi dang CM ji BJP nungi asütsüla, kechiyong par party denbo BJP-i menden teimba angu ta ashi. Ajisüaka onoki teti agia

teloktep akümtsübur, ibayongji Nitish CM kümdaksü," ta paisa metetdaksü. **O p p o s i t i o n** Mahagathbandhan teloktep aija Shah-i, Bihar nung Lalu Prasad Yadav yimsüsüba meteta alirtemi parnok nem sorkar mekümdaksüner, ta ashi. Congress-a aija Shah-i, "Teti agia Congress-i teloktep nung party tilatem mezüngshir. Tangar tila kümdaksütsü merangba mesüra tila ama repringtsü merangba ajanga Congress tila kümogo," ta metetdaksü.

### Sübokrem ken o nung CBI-i Punjab DIG, Harcharan Bhullar puogo

**New Delhi, October 17 (Agencies):** Sen lakh 8 sübokrem meshiba ken o dak sendakba nung Central Bureau of Investigation (CBI)-i Punjab Deputy Inspector General of Police (Ropar Range) Harcharan Singh Bhullar den nisung ka densema puogo. CBI-i Bhullar'er ki mita aoba mapang nung par kidang sen crore 5, sentioet seret 1.50, kiojen documents, sen aika jenjang gari ana jabi, sen aika jenjang anütetzü 22, locker jabi aika, bendanglen nungi bener aruba yi litre 40, double-barrel prangpong ka, pistol ka, revolver ka aser airgun ka den injang aika angu, ta ketdangsertemi metetdaksü. Fatehgarh Sahib kübok Mandi Gobindgarh nungi merang tamajung alizüka shishir kati, 2023 küm pa anema FIR ka benoka aliba agientsü atema Bhullar-i pa dang ita shia pa nem

sen agüjang, ta takhangba agütsü. Iba nisungba jagi ken o benokba sülen CBI-i Bhullar apu. CBI-i Bhullar denji külemi pa atema tiyongtsü nung inyaksür, Kirshanu-a apu. Kirshanu ket nunga sen lakh 21 liasü, ta parnokisa metetdaksü. Mezüng bushisüngdangba ajanga DIG Bhullar-i pa atema tiyongtsü nung inyaksür, Kirshanu ajanga Akash Batta dang pa anema benoka aliba FIR agientsü atema pa dang sen lakh 8 akhangba jangaogo, ta CBI-i metetdaksü. October 16 nü benokba FIR nungi yamai zülua lir, "October 11 nü Sector 9-D Market, Chandigarh nung tiyongtsü nung inyaker Kirshanu-i WhatsApp call ajanga public servant ka dang DIG Bhullar tetuyuba nung ajemdaker sen lakh 8 akhangba record süa lir." "Iba sensaksemji ajanga ken o benokeri ashibaji shidak ta kuli

sayur aser call asüdag amshiba mobile number ji DIG Bhullar tenüng nung register süa lir. Ibaji ajanga sen akhangba aser ozüng alema inyakba jangar," ta FIR nung shia lir. Ajioda Bhullar aser Kirshanu na anema Bharatiya Nyaya Sanhita, 2023 kübok Section 61(2) aser Prevention of Corruption Act, 1988 kübok Sections 7 aser 7A nung ajemdaker ken o benok. Bhatta-isa, "Ni taila bill amshi, ta kü nem tai tonglokja 2023 küm ni anema ken o benok," ta metetdakja liasü. Iba dak sendakba nunga ken o ka benokogo. Bhullar ya yaküm November ita nung DIG (Ropar Range) shima liasü. Ropar Range kübok Mohali, Rupnagar aser Fatehgarh Sahib district tem lir. Pa ya taoba mapang Punjab Director General of Police, M S Bhullar'er jabaso lir.

### November 10 nungi tenzüka Census tetendangba agütsü

**New Delhi, Mongputeni/October 17 (Agencies):** Census 2027 kübok houselist tetendangba November 10 nungi tenzüka November 30 tashi agütsü; states aser union territories ajak nung tesem kar shimteta iba tetendangba agütsü, ta sorkari metetdaksü. Iba tetendangba ya census dak sendakba questionnaire asadangtsü asoshi lir. November 1 nungi November 7 tashi digital aser tanga inyakyim balala ajanga data bendentsü. Mezüngbuba shilem nung houselisting dang asütsü aser sangküm April 1 nungi tenzüka census exercise tenzüksü. Census Act, 1948 kübok Section 17A aser Census Rules, 1990 kübok rule 6D nung aliba tashi amshia Ministry of Home Ministry (MHA)-i iba sangdong agütsü. Taküm June 16 nü union home ministry-i, tang mezüng digital mode nung Census 2027 agütsü tebilemba lir, ta metetdakja liasü. Ladakh Union territory den Jammu & Kashmir, Himachal Pradesh aser Uttarakhand ama rürjep alaba state tem nungbo reference date ji ita trok jelia 2026 küm October ita mezüng anogo asütsü, ta MHA-i metetdaksü. Census 2027 kübok 2027

küm tatembanglen tashi nungbo final population data renemtsü, aser iba nungji ajemdaker delimitation tenzüksü aser 2029 küm Lok Sabha election tashi nungbo tetsürtem nem menden lemsütsütsü. Census dak sendakba housing listing ji shilem ana lemsar April 1, 2026 nungi tenzüka September 2026 tashi agütsü, iba sülen 2027 küm February 9 nungi February 28 tashi nung nütsüng tejangja sükdangtsü. Taoba hopta Registrar General of India aser Census Commissioner office nung Census 2027 pre-test atema training agütsütsüpurtem nem anogo pezünü tashi training agütsüogo, aser tangbo training agirtem jagi states/union territories ajak nung enumerators nem training agütsü tenzüko, ta ketdangsertemi metetdaksü. Census 2021 atema-a pre-test agia liasü, ajisüaka coronavirus wara ajanga census magitet. Tangbo census inyakyimji kanga melenshiogo. Kobi melii enumerators aser supervisors lakh 34 aser Census ketdangser lakh 1.3 atema training ayongzüka parnok nem Census apps amshiyim, Census management aser monitoring system tesayuba agütsütsü.



October 17, 2025 nü New Delhi nung Ato kilonser Narendra Modi-i Egypt Foreign Minister, Badr Abdelatty den senden amendang tangokba noksa nung angur.

### India nung tang mezüng yangluba Tejas-Mk1A raraba tayimtsü saya

**Nashik, Mongputeni/October 17 (Agencies):** Hokolbarnü Maharashtra kübok Nashik nung aliba PSU Hindustan Aeronautics Limited (HAL) Nashik complex nung yangluba Tejas-Mk1A raraba tayimtsü tendanga sayaogo. Defence minister Rajnath Singh-i LCA aser HTT-40 (trainer aircraft) assembly complex semzüksüba sülen raraba tayimtsüji tenzüka liasü. Tejas-Mk1A ya tang mezüng Indian Air Force (IAF) nung züngoker ajisüaka ibaji raraba hadir aser radar integration tendangba dak tuluka keta lir. Tejas-Mk1A nung beyond-visual-range air-to-air missile, short-range missiles aser laser-guided bombs tendangtsü aser

iba tayimtsü nungi Israel nung yangluba ELTA ELM-2052 radar aser fire-control system inoksemtsü. HAL indang operational lines ana Bengaluru nung lir aser tasembubaji Nashik nung amenok; iba facility nung küm shia raraba tayimtsü 8 tashi yanglutettsü. Taküm August ita nung Cabinet Committee on Security-i Mk1A fighter kjets 97 yanglusemstü atema sen crore 66,500 lemsükja liasü, aser ibaji densemabo jets ajak senteper 180 asütsü. Air Chief Marshal AP Singh-i mapang shia, raratsü atema renema alitsü asoshi IAF-i küm shia ishiba agia raraba tayimtsü 40 bosa nungdaker, ta metetdakja aruogo.



October 17, 2025 nü Maharashtra kübok Nashik nung aliba Hindustan Aeronautics Limited (HAL) nung Defence Minister Rajnath Singh-i India nung tang mezüng yangluba Tejas Mk1A raraba tayimtsü sayatsüdag tangokba noksa nung angur.



## TIR YIMYIM YIMOBILEM (EDITORIAL)

DIMAPUR

KÜPTOKNÜ

MONGPUTENI 18, 2025

### Kechiba ABAM nung shilem aginer ?

**Y**ashi yakanü iba osangkaket Olemsabang nung Aor lenir tebu tedi tajung anati ABAM nung tir nungi shir committee balala nung ketdangsüba mapatem ajak arogo nung toklang tenzükertemi dang shilem agiba ya melenshitsü nüngdakba indang shisalemsatepogo. Atangji, arogo nung telongjem tentet ABAM ya arogo nung meyang, anungji kiburji arogo nung toklang tenzükertem masü saka arogo züngsemtemji lir. Ajisüaka, arogo nung züngsemtemi ita sen agüja ayuba toklang tenzükertemi dang ABAM amokbanger ketdangsünüba ya kechiba (?) ta aiben bilemdangtsüsa adoker. Atangji, akhidangbo arogo züngsemtem rongnungi tebu tedi tajung ka ABAM tir ser meraketa inyakyim ajak ketdangsüa aru. Aji oda, meshitak dangbo ABAM nung Executive Secretary-ba danga aser Secretary-tem danga ABAM tiri tarütsü aser tajungshi o shia metongshija aru. Iba jagi ABAM nung inyakerem Executive Secretary-i anir pei taküm kanga kümdanga lia aru aser mapa nunga nendaka inyak. Ashiko, iba ama talenba nungi salanüba agi sannükertem adenshia ABAM nung tir ya arogo züngsemtem nungi masü saka toklang tenzükertem sannükertem nungi agitsü ta bangjemer pangzüng küma latetdaksü südi. Iba tangatetba nung yashi yakanü iba osangkaket nung lemsatepertemi ashiba ama, sannükertem rongnungi melentepa küm kaka ABAM tir inyaka aruba angur aser ABAM kübok committee balala nunga toklang tenzülertemia tua, atangji ashi ama, arogo züngsemtem rongnungibo mozü amai tejang kaka anana shimoka ayuba angur. Atangji, item toklang tenzükertem jagi 'ni shimang' ta asüba agi shimer masü saka Impur nungi ABAM tenük agi asüng apia shimer. Aji oda, tangbo ABAM ya Ao Baptist Arogo tamangertem telungjem masü saka Ao Baptist Arogo nung Sannükertem telungjem amai ka dang kümogo. Atangji, sannükertemi aniba mungdang telungjemji tanela milak jangrutetdak küma aser mapa ajak nung temlung lemtetba agi "ABAM indangbo audit magiyonga kecha masü," ta tamangertemi shitetsüsa leniba tajung agütsütet nungbo jungla, ajisüaka ABAM inyakyim nung temlung melemtetsüsa aser senotsü amshibaren nunga audit-a junga magitettsüsa atalokra, ashiko, tamangertemi ABAM-ji toklang tenzükertem lema agiang ta ser kibur mali amai sentoka toktsütsüa akok. Aji oda, asenokbo ABAM nung aser asenok lim arogo nung ochi meshitetra, kodaser asenok Village Council, VDB aser Chief minister office nung ochi angutsü ? ABAM ya ochi len sayudak sabang lir, aji oda asenok asoshi ochiji ABAM nungi tenzüktsüla. Ajisüaka, ABAM nung ketdangsertem noklang nung shilem tir (80%) dak tali arogo nung toklang tenzükertemi amokbanger ochimashi tang tuluba tuluba moktet nungbo, asenok tsüraburtemibo odanga anidakdi, saka tang asen chirtem Gen Z purtemi ABAM leniba nung anidaktsü ta bilemer na ? Gen Z purtem shirnoki Nepal nung ochimashi yimten yimli atsüngdok, yamaji asen lima nunga memenui yimten dang masü saka arogo aser mungdang nung ochimashir aser parnok mapatem ya Gen Z purtemi atsüngdoktsü. Asenoki ibaji atalok matai asenoksasa asenok temlung meyipa inyakyim melenshitsüla. Aji oda, Yisu Khrista shia arua kotaki tur külen, Pai nütsüngtem nem tanela ain aser tashi agütsüba amshia Tenyartem mapang, Par nütsüngtemi Yisu Khrista temeim indang kuli süa jajaba mapang, parnokibo parnok sülen yaritepa anidakertem dang " onoki sarasademba aser osang tajung sayuba mapa inyakdi," nenoki rongsen bendena chiyongtsü renema anganüba mapatem inyakang ta ser osangtajung sayutsüngiba o ali shi nüngdak asoshi inyakba mapa na bendang aser alima tesem balala nung tasüa majem sademsadema Yisu Khrista osang tajung indang kuli süa jajaba asenoki Tenyar mapa nung shia aliba angur. Tanü asenok toklang tenzükertemia toklanga metenzükertem arogo nung züngsem purtem dang yamaji shitetlasang , arogo aser mungdang koda ochiba aser tashi taitba nung ola ta bilemer.

## OLEMSABANG

### Tanü Naga lima loktiliba tensa tia asadangba

L . Kika Pongener

*(Yashi adok nungi...)*

Ano tanü asen lima, ya tang aliba dang nungi tajungba ka küma yanglushidi ta bilemra....Tanga telok khen oda yutsür, tamasa arogo aser mungdang yanglushitsüla; kechiyong tanü asen lima nung lim arogo nung aser mungdang daka nuburtemi temlung melemteter aser tamang makatetsüsa kümogo. Tanü asen lima nung loktiliba ajunga nung ochi agi kanga anüngakonger; oda Shitsü - Shingo (Monkeys) rongnung tobur tajung kobala-ang meshimtetba amai; koba telok ochi tashiba asütsü (?) ta shimtetdi asünung....Teshimtettsü kata mali kümogo. Sorkar nungi tenzükertem yimden, arogo, mungdang aser loktiliba teimba ka ochimashi agi sünga lir. Tanü asen lima ya ochishir sempaba aser nupeta arishiba lima ka kümogo.

Ano tanü asen lima nung lanur zünger mapa manguba tebilemetsü ya; kanga ulura kümogo ta benpettsü amai jembir. Ajisüaka, kanga junga shisadangra, asen lima nung tazünger inyaksüba aser mazünger inyaksüba mapa nangdaka dang kar ta bilemer. Asen lima nung tzümartembo tazünger-a tazünger yari; aser mazünger-a mazünger yari; mapa meranga inyaka takar akümer. Anungji mapa maka masü azümesenba agi mapa maka kazüteper dang....Kechiba sura asen Naga nung lanurtemi mapabo meinyaknur; saka ita-senbo tulu aginur; aser tezülen lenmang balala nungi 'site income' aika angutsüba mapa dang inyaknur aser bushir. Aji oda, asen Naga nung mapa meinyaknu azümesenba shisatsü adenba yagi; ashi-auer aser rakzükrakterem tali akümer; nüjiso tenung ademer meshimetsür tali akümer; loktiliba ajunga nung rongsen ketdangsuba reprangdangra ochimashi inyaker tali akümer; aser asen lima terenloktsü tim merenloki rajang akümer.

Ano kanga junga shisadangtsüba kaji....Asen lima nung; akhidangbo sadi kuli agia kibong akümer ariana kar dang liasü; ibajagi yimtsüng aser jila nung lim arogo aika nung Deacon shimtsü nubu maka kanga tim-atemer....Ajisüaka, tanü putu nungbo sadi kuli magi-i kibong akümer kata mali kümogo. Lim arogo ajaki iba ya khen kanga junga shisadangtsüla ka lir ta bilemer. Anungji küm ishika sulenbo lim arogo nung Deacon shimtsü atema....Shiba-ang shimer shiba meshim; arogo nung "Nüngtet Luden' shirnok südir; parnokji nüngsen kanga agitsüsa akümtsü..... Aser lim arogo kar nungbo Deacon shimtsü atema 'Election' agitsüsa akümtsü südi. Anungji lim arogo nung Pastor-i anir Deacon Board-i Temeshi kiyimba kulizüng agütsüba mapa ya; nungsen metsübui kanga pongpa-pongpa mesui kanga ret-reta agitsüla.

Ano "Naga limaji Khrista asoshi" ta yimjak nung yimyim ayimoktsü.... Saka asen Naga lima telung nung tensa tiagi jungjunga reprangdangra "Mojing lima" tang mesuk. Aji oda, khristan lima nung ashi-auer aika lir; rakzükrakterem aika lir; nüktapangdar aika lir.... Taoksatsüka Tsüngrem lartemia dena maaksutsü mapa inyakba angur....!!! Loktiliba ajak nung ochimashi agi sünga lir....!!! Tanga telok oda yutsür lim arogo nung aser mungdang nunga dena sen lakh/crore menden tashi temong maka samaba otsü/osang angazüker...!!! Tanü asen lima nung Tsüngrem lartemia dena rongsen ketdangsuba nung nuburtemi temlung melemtetsüsa inyakba angazüker....!!! Surabangla, shirnok dak-ang tamang kaatetsü....??? Ano Election arura nubur aikati sen-yong pei temeden vote ayoker....!!! Sürabangla, iba ama lima dangji "Naga limaji Khrista asoshi" ta koda ajatsü....??? Anungji Naga limaji 'Khrista asoshi' ta sangdongba ya kangasa taaktsüka lir.

Atangji, asen Naga lima ya noklang nung shilem tokür (90 %) khristan aliba linuk ka lir. Assembly nung tatar roker (60) prongla khristan temeja aliba linuk ka. Sorkar tenzükertem tazüngbur teimba ka khristan lir. Anungji shitakba jembidi sura, ochimashi mapa (Corruption) khenyongi maliba aser ochi tashiba State-ji Nagaland State ya asütsüla. Saka tesasatsüka, asen lima nung Tsüngrem lar aser arogo tenzükertem daka nuburi tamang makateter.... Anungji asen Naga lima teraksa ya yanglushitsü bilemra.... Tamasa lim arogo nung aser Tsüngrem tenzükertem nungi tenzükertem yanglushitsüla.

**Iba Olemsabang nung lemsaba ken-o aser shisatsü ya iba ocet züluri bilemba ken-o ama tazünger angateta agitsü mepishir**

# BGEA-i Sydney nung Asian-Pacific Congress on Evangelism ayongzüksü



Taküm May ita nung Germany yimtiba, Berlin nung Billy Graham Evangelistic Association (BGEA)-i ayongzükba European Congress on Evangelism senden nung BGEA Tir, Franklin Graham-i jembidang tangokba noksa nung angur.

**October 17, 2025:** Alima nung tang tashi Khrista osangtajung mangashidangba nütsüng aika aliba regions nung Khrista osang proktsü nükjidong nung Billy Graham Evangelistic Association (BGEA)-i 2027 küm August 24-27 anogotem nung Sydney, Australia nung Asian-Pacific Congress on Evangelism ayongzüksü.

Iba sentong nungji linük 50 nungi Khristan lenir 2,500 shi adentsü.

Anogo asemnü sendenji Asia aser Pacific nung aliba Arogotem atema kanga tongtibang mapang ka asütsü, kechiyong iba senden nungji Khrista osang sangdongtsü atema lenirtem ajungshitsü aser nütsüng billion pezü jungnüa aliba region nung tamangertem longjemer inyaksü atema bangjemtsü.

Asia aser Pacific region nung nütsüng billion 4 jungnüa lir, ajisüaka tang tashi ano nütsüng aikati Khrista osang mangashidang.

Taküm May ita nung Germany yimtiba, Berlin nung BGEA-i ayongzükba European Congress on Evangelism kanga takok ngua agiogo. Iba senden nungji linük 55 nungi Khristan lenir 1,000 shi aden.

October 16 nü BGEA-i sangdong ka ajanga, "Sydney nung Congress ayongzükba tongti nükjidongji nütsüng aikati Yisu Khrista memetetba tesemtem nung tasü itta osangtajung lemsateptsü atema pastor tem, sayutsüngirtem aser ministry lenirtem ajungmesotsü atema lir," ta metetdaksü.

2027 küm iba senden ya International Convention Centre Sydney nung agitsü.

BGEA-i mezüngbuba World Congress on Evangelism 1966 küm Berlin

nung ayongzükba liasü, iba sülen 1983, 1986 aser 2000 kümtem nunga Amsterdam nung ayonga agi.

Taküm May ita nung European Congress nung okila jembidang Anglican Archbishop of Sydney, Rev. Kanishka Raffel-i, "Tawa Berlin nung European Congress on Evangelism nung temoatsü ngua adener rongnung ni densema lir. Billy Graham Evangelistic Association-i 2027 küm Sydney nung Asia-Pacific Congress on Evangelism ayongzüksü tebilemba aliba atema ni kanga pelar," ta metetdakja liasü.

European congress tembangba sülen Raffel-i, "Berlin nung ayongzükba sentong ajanga onok nem arok mangdang ka agütsü-tasü itta aser jangjajangja Khrista osangtajung proktsü atema tarongba tanela ka onok nem agütsü," ta metetdaksü.

Billy Graham Evangelistic Association nung Tir aser CEO, Franklin Graham-i, "2027 küm sentongji Asia aser Pacific nung aliba Arogotem atema kanga tongtibang sentong ka asütsü. Kanga tezülen aliba arem, asetkong, nütsüng jenti aliba yimtittem aser kanga tezülen tenemsüng nung aliba yimtsüngtem ajaki oa Khrista osangtajung lemsateptsü atema onoki putu tasen nung aliba Khristantem melungjang nung milen tsükloksüner," ta metetdaksü.

Asia aser Pacific region nung nütsüng billion 4 shi lir aser iba region nung nütsüng shilem 10 shi dang Khristantem lir.

Philippines nungi Bishop Efraim M. Tendero-i, "Alima nung nütsüng teimba aliba region ka aser tangtashi Khrista osang mangadangshiba nütsüng

teimba aliba region ka nung osangtajung lemsateptsü atema tamangertem züngoktsü, training agütsütsü aser tashi agütsütsü atema kanga rongdak kümogo," ta metetdaksü.

Efriam ya World Evangelical Alliance nung global ambassador inyaker aser Galilean Movement nunga executive director lir.

Asia-Pacific Congress on Evangelism nungji tejaokertem dang adentsü. Sentong ayongzükertemi Khristantem dang 2027 küm agitsü aliba sentong atema tang nungi sarasadem tenzükang aser maneni sarasademjang, ta metetdaksü.

Asia-Pacific nung Arogo lenirtem aikati Sydney nung ayongzükba sentong ya mapang shidak ka nung ayongzükba, aser iba ya ajanga region nung Khrista osang proktsü atema Khristan lenirtem longjemdaksütsü, ta metetdaksü.

Billy Graham Evangelistic Association nungi sayutsüngir, Dr. Robert Cunville-i, "India aser region ajak nung osangtajung proktsü atema ajungmesotsü nungdaka kümogo. India-i mezüng Khrista osangtajungji 52 AD nung Yisu nütsüng Toma ajanga angashia liasü aser China nunga 63 AD nung mezüng Khrista osangtajung angashia liasü. Iba sülen küm 2000 jungnüa arur, ajisüaka tanü tashi Asia nung Khrista osangtajung mangashidangba nütsüng million aika lir," ta metetdaksü.

Paisa, "Ibayongji ni Sydney nung ayongzükba sendenji kanga yongyar. Iba sendenji ajanga Kangki aser Yisu Khrista zü indang osang maneni sangdongtsü atema asenok asüngsashitsü asoshi sarasadem," ta metetdaksü.

## ANOGO ABEN TSÜNGREM DEN

### Nenok nisung shiai pei indang mebilemi, pi indang bilemang (Filipi 2:4)

Filipi tapu ana nung sapi oji, "tangartemji lir." Kibuba Yisu tangar asoshi ali. Epaphroditus tangar asoshi ali. Asenoka tangar asoshi alitsüla, kechiaser ibai shidak saka ano ibai asenok meyong tajung lir. Tangar asoshi alitsü tasak kümra inyaksübaji tasakba asütsü.

Asenok lokti nung pei atema dang bilemba agi sünga lir. Tangar asoshi mazüngi inyaksü melen, kidang azümasena alir. Tila tiri nguya ngushiba atema nemnemshishia, shingai pa atema mebilemtsür ta jembia alir aser peisasa pei atema aria bilemba agi meyokdaksür. Koda ka tali pei atema bilemer, patakaji teimla makaba akümtsü. Takümüji tetsübuttsü amman ama reprangtetsü. Yakta parnoki doctor dangi aotsü. Doctori mozü aika zülutsütsü. Mozü-i pei atema dang aliba aneptsütsü makok.

Pei atema dang bilemba tashidak aneptsü mozü tajungtibaji tangar tenzükba takümüji lir. Tambur tantsürtem tembar nungdaka kidang mena lir. Hospital nung teyari aginürtem lir. Missionarytem pei kidang nungi osang angashinüa lir. Tanelatem kümzüktsü aser Khristantem sayutsü nungdaka lir. Taküm nung teinyaksü mapa agi sünga lir. Aser tangar asoshi aliba ajanga asenoki tembar tali yimtetter, asen taküm tali jangratemtsü akümer, aser temulung süa alir. P.M. Derhani ashi, "Tangar asoshi aria bilemba temulungjang pa meyong tejashi ajanga memokseper aser pei sasa aria bilemba miim ajanga mekangshir."

Na ama alitsü, Kibuba, tangar atema alitsü kü omen asütsü kü dang yariang, O Kibuba.

## Mel Gibson indang 'The Resurrection of the Christ' film tangok tenzükogo

**October 17, 2025:** Film Director Mel Gibson indang "The Passion of the Christ" film 2004 küm saya aser iba film kanga takok anguba sülen küm aika lir tang "The Resurrection of the Christ," film tangok tenzükogo.

The Resurrection of Christ film nung Finland nung actor Jaakko Ohtonen-i Yisu shilem agitsü. The Passion of Christ film nungbo Jim Caviezel-i Yisu shilem agia liasü.

The Passion of Christ film ajanga dollar sen million 610 ajangzüketa liasü.

Mel Gibson aser Bruce Davey nati Icon Productions banner aser Lionsgate den senteper produce asüba film tasenba ya 2027 küm shilem ana lemsar sayatsü.

Yisu film tasenba nung Cuba tsür actress Mariela Garriga-i ("Mission: Impossible - Dead Reckoning nung shilem agila) Mary Magdalene shilem agitsü. Taoba mapang Monica Bellucci-i Mary Magdalene shilem agia liasü.

Kasia Smutniak ("Domina")-i Mary shilem agitsü; taoba mapang nung Maia Morgenstern-i Mary shilem agia liasü. Italy nung actor Pier Luigi Pasino-i Peter shilem agitsü aser Riccardo Scamarcio-i Pontius Pilate

shilem agitsü, ta producer temi metetdaksü.

"The Passion of the Christ" film sülen tang film tasenba "The Resurrection of the Christ" ya Yisu Khrista Kangki nung metaba sülen anogo asemnü lir tatalokbatem indang lir, ibayongji film tasenba nung shilem agirtem ajak nübo tasen shim.

Mel Gibson-i film tasenba ya "Braveheart" film otsü zülusang Randall Wallace den senteper zülu. Tang tashi nungbo Yisu film tasenba otsüji tejangja memetet, ajisüaka film tasenba ya Yisu Khrista tasü nungi shia aruba nung rangloker renem.

"The Resurrection of the Christ: Part One" ji 2027 küm Good Friday anogo, March 26 nü sayatsü, iba sülen "Part Two" ji Yisu Kodaki ayipa atuba 'Ascension Day' anogo May 6 nü sayatsü. Iba film ya Cinecittà indang Studio 22 nung tangoktsü, iba dak alia Italy kübok akhidang aliba Matera yimti aser anasa aliba Ginosa, Gravina, Laterza aser Altamura jilatem nunga tangoktsü.

Tamalen "Passion of the Christ" film ya Aramaic, Hebrew aser Latin oshitem nung tangoka liasü. Iba film ji Yisu Kangki nung metatsü jaldang tesüsabuba ghonda 12 tsüngda tatalokbatem indang lir.

**AO OSHI ANGAZÜKDAK:  
TANÜ ANGAZÜKTSÜBA OJANG**



**Tokong**

(n) ali temeungket (ridge)  
\* Asen lima ya tokong tenem agi meketbanga lir.

**Tokong**

(n) ken aser sangro nung taren telemsa (stanza)  
\* Linük naklo kenbo tokong ka dang asütsüla.

**OLONG PAITEP # 7303**

		1			2		3		
4									5
6				7			8		
							9		
10							11		
12	13		14						
				15					
	16								

**TIPIEN**

- 2. Senshi - (4)
- 4. Temerang - (6)
- 6. Ajungben - (7)
- 8. \_\_\_ \_nalim - (3)
- 10. Te \_\_\_ \_m - (4)
- 11. Lisu agi arak - (4)
- 12. \_\_\_ \_ji majung - (3)
- 14. Süng nang - (7)
- 15. Ayong tezülen - (6)
- 16. Sarasadem tatembang - (4)

**LANGTSÜNGLEN**

- 1. Ajüzüa senzüba shiruru tilla ka - (4)
- 3. Shisa\_ \_ \_ - (7)
- 4. Tesasa - (7)
- 5. Tekolak-o-teberem tsüngda - (9)
- 7. O shia merenshi - (4)
- 9. Inyaksü molungtet - (9)
- 13. Tepu aküm - (5)

**OLONG PAITEP # 7302 TELANGZÜBA**


**TIPIEN :**

- 1. Yiar, 3. Tesola, 7. Yimra,
- 8. Tangar, 9. Peria, 10. Tanur,
- 11. Tassen, 13. Lemjem, 15. Tambu,
- 16. Khuret, 17. Sang.

**LANGTSÜNGLEN :**

- 1. Yimti, 2. Amen, 4. Shiner, 5. Alaka,
- 6. Satan, 9. Putet, 10. Tembar,
- 11. Tatok, 12. Amang, 14. Jala.

**NAI-A YA METETTER MA**



Gujarat nung cooperative sector den sendaktepa alir nisungtemi Prime Minister Narendra Modi dang pelar ta shia 1.11 crore postcards tema yokogo aser iba ajanga Guinness World Record ka yanglutetogo. Iba mapa ya Department of Agriculture, Farmers Welfare and Cooperation kübok inyak aser nisungtemi PM Modi dang GST reforms aser tanga maparen balala atema pelar ta shia 1,11,75,000 postcards yok ta Gujarat sorkari metetdaksüogo.

**Zubeen Garg asüba atema one-man judicial commission tentet**



Lok Sabha nung leader of the opposition Rahul Gandhi-i Guwahati tezülen Sonapur nung kentener Zubeen Garg mang rongdokdak semdanga tetushi agütsüba noksa nung angur. Rahul-i Zubeen rongdokdak 'gamosa' ta ajaba traditional Assamese scarf aser narojung ka yutsü. Assam Pradesh Congress president Gaurav Gogoi, AICC general secretary & Assam in-charge Jitendra Singh aser Assam legislative assembly nung leader of the opposition Debabrata Saikia nunger den Assam nung Congress lennir tejentemi Rahul meina liasü.

**Guwahati, October 17, 2025**

(Agencies): September 19, 2025 nü Singapore nung kentener Zubeen Garg asüba dak sendakba kulitem bushisüngdangtsü atema Assam sorkari One-Man Inquiry Commission ka tentetogo.

Iba commission ya Gauhati High Court nung Judge Justice Soumitra Saikia asütsü. Commissions of Inquiry Act, 1952 kübok iba commission tentetogo.

Iba commission ajanga Zubeen Garg asüba kulitem aser tensa bushisüngdangtsü aser pa asüba aser masüdag tensa asadangtsü.

Iba tatalokba dak sendakba nung nisung, ketdangpur mesüra rejutemi mapa inyakba asadangtsü aser kari tepsetba, mesüra tasa atongba mesüra ozüing alema inyakba jangjatsü iba commission nem tashi agütsüogo.

Iba commission ajanga ita trok tsüngda osang agütsütsü aser Assam Khadi & Village Industries Board, Maniram

Dewan Road, Chandmari, Guwahati-781003 nung commission office lapoktsü.

Kija kari kulitem agütsünüra notarised affidavits ajanga agütsütsü akok aser supporting documents adentsüla.

Iba commission atema secretary Aroop Pathak, ACS-i state & national newspapers, All India Radio, Doordarshan, aser satellite channels ajak nung publicity agütsütsü mepishiogo.

Nüngtugu kentener Zubeen Garg asüba dak sendakba nung apuba Shekhar Jyoti Goswami aser Amritprabha Mahanta na anogo 14 tashi CID ket nung ayuba sülen tanü judicial custody-i yok aser Haflong Jail nung puokogo.

Tena tanü Haflong nung Chief Judicial Magistrate (CJM) court tsüngdangi ao.

Zubeen Garg asüba dak sendakba ken o nung nisung 7 pua lir. Shekhar Jyoti Goswami aser Amritprabha Mahanta dak alia Shyamkanu Mahanta, Siddhart Sharma, Sandeepan Garg aser Zubeen indang

personal security officers ana- Nandeswar Bora o Paresch Baishya nunger lir. Parnok ajak Baksa Jail nung puoka lir.

Külen, Singapore Police Force (SPF)-ibo Zubeen Garg asüba dak sendakba nung osang jangjashitsüogo.

Iba ken o ya with Singapore nung Coroners Act 2010SPF nung lateta aliba ama bushisüngdang südar aser tang tashi nung taitüsü keta puteta mali. Ajisüaka jungjunga bushisüngdangtsü atema ita asem shi mapang agitsü ta SPF-i ashi.

Iba bushisüngdang tembangba sülen State Coroner nem osang agütsütsü aser parnoki Coroner's Inquiry (CI) asütsü asü masü lemtettsü. Coroner ajanga bushitetba osangji yimjak nung metetdaksütsü ta parnokisa ashi.

Singapore nung High Commission of India-i mepishiba ama October 1, 2025 nü SPF-i autopsy report aser preliminary findings agütsüogo.

**Army Camp ka amak; ULFA (I) dak temulung malemer**

**Tinsukia, October 17, 2025**

(Agencies): Assam kübok Tinsukia district nung Brihostibar aonung mejangjaba nisung kari Indian Army camp ka amak.

Tanep 12:30 ako meta Army tesepe tsütsü Under Barrel Grenade Launchers (UBGL) Kakopathar aser temeket

asem yok aser minute 30 jungnüa injang khaloktsü ta osang angazüker.

Nisungtemji truck gari ka nung arur army tesepe amak ta tenüing kuli agütsürtemi ashi. Iba lendong nung Army asem yiru.

Iba tatalokba sülen sepaitemi

tesemtem nung search operations tenzüko aser civilians senzusenbongba aziüoka lir.

ULFA (Independent) ajanga iba mapa inyak asütsü ta bilemer aser tawa upper Assam nung sepaitem amakba rongnung iba ya tulutiba asütsü.

**Manipur sorkari Imphal nung 24x7 petrol pump lapoktsü tuyur**

**Imphal, October 17, 2025**

(Agencies): Manipur sorkari Indian Oil Corporation Limited (IOCL), Imphal dang Imphal nung retail fuel outlets ana rotational basis nung 24x7 lapoktsü tetuyuba agütsüogo.

"General public yaritsü atema state sorkari IOCL Imphal dang oil pumps ana anogo melentepa khen danga meshibangi lapoktsü tetuyuba agütsüogo" ta Department of Consumer Affairs, Food and Public Distribution (CAF & PD), Manipur, Director K. Bino Singh-i ashi.

Sorkari ashiba outlet ana ya Khuyathong nung aliba M/s Phulchand Trilokchand (PCTC) Oil Pump aser North AOC nung aliba M/s Baklwal Enterprise Oil Pump lir.

Nisung kari pump shibangba sülen fuel stations anasa lenmang nung aser nisung aliba tesemtem nung bottles aser jerry cans nung motor spirit (petrol) enoker ozüing alema ayokba osang angazükba sülen sorkari iba lemtet agi.

Iba amai petrol ayokba ya ozüingi memelar aser

Prevention of Black Marketing and Maintenance of Supplies of Essential Commodities Act, 1980, aser Petroleum Act, 1934 kübok temerenshi lir.

Ibala inyakim ajanga mi lendong atalokba dang masü saka lendong balala ataloktsü ana nung lir.

CAF & PD Department-isa district ajak nung Superintendent of Police dang October 10, 2025 nungi tenzüker ibala ozüing alema inyaksangshirtem pua merenshitsü tetuyuba agütsüogo.

## Putin den Hungary nung ajuruteptsü: Donald Trump



**Washington, Mongputeni/Oct. 17 (Agencies):** United States Tir Donald Trump-i Ukraine nung rara aliba indang jembitsü asoshi Russia Tir Vladimir Putin tena ajuruteptsü mulungtepogo ta ashi.

Trump-i Brehostibarnü social media nung sangdong ka nung pai Putin den Hungary yimtiba Budapest nung ajuruteptsü ta sangdong. Tena tsünga phone ajanga jembiba sülen iba osang ya sangdong. Tena hopta ana tsünga ajuruteptsü akok, ta Trump-i mapang tatsüka lir osangbener senden ka nung ashi.

Trump ya Ukraine Tir Volodymyr Zelenskyy den Washington, DC nung ajuruteptsü anogo ka lia phone ajanga Putin den jembiba, aser Ukraine leniri ano maneni Trump dang Tomahawk missiles yoking ta ajungshitsü imlar, koba ajanga Russia linük tarokba nung oa maktettsü.

Truth Social nung, Hokulbarnü Oval Office nung Zelenskyy dang Russia den jembishinüba indang ashitsü, ta Trump-i ashi.

"Tanü telephone ajanga sensaksemba nung tajangzük tulu liasü ta ni amanger," ta pai ashi.

Trump-isa US aser Russian ketdangsürtem taruba hopta ajurutepta Putin tena ajurutepta senden amentsü asoshi renemtsü ta ashi.

August ita Alaska nung ajurutepta sülen lenir ana tsünga sensaksemba ibai

mezüngbuba alitsü.

Brehostibar nikongdang X nung Zelenskyy-i tashi aser ochi obendang oshi ajanga dang Russia ya jembishinüba langpangi anir arutettsü, ta ashi.

"Tomahawks indang angashili Moscow-i jembishinü tenzükhshitsü aritepba asenoki angur," ta Zelenskyy-i ashi.

Zelenskyy-i Hokulbarnü White House nung Trump den ajuruteptsü renemer, aser Kyiv ya Russia-i anüngen nungi amakba nokdangtsü aser meyiper amaktsü asoshi teyari tuluba bushir.

Russian sepaitemi Brehostibarnüa Ukraine nung maneni bomb poklokja, drones noklang aika den missiles ter dak tema energy dak sendakba ki o jen densema tesem balala nung tenük yoker amak.

Iba sülen Ukraine kübok region ti nung 'blackouts' ajangshi, ta Ukraine indang national energy operator Ukrenergo-i Brehostibarnü ashi. Linük nung private energy company tulutiba DTEK-ia Kyiv nung power aiba shia liasü aser amakba yong central Poltava region nung natural gas agitetba mapa anen ta ashi.

Tan ita natural gas infrastructure ya trokben buba raksatsü, ta Ukraine sorkar meyong oil and gas company Naftogaz ajanga shia liasü.

Hopta tetenzüklen Russian sepaitemi Ukraine nung mozüki ka aser United Nations convoy ka amakdang nisung 57 yiru

aser shiranger 50 anizüker aotsüsa akum.

Kyiv-i meyiper Russian targets nung asendenshir ama aser iba mapang Saratov region nung oil refinery ka densema amak.

Ukraine-i meta talang nung maktettsüba jenjang tajungba akumba ajanga Trump-i iba rara tembangtsü asoshi indang indanga jembishinütsü ayongzükba ama Putin-i inyaktsü, ta Zelenskyy-i ashir.

Tomahawk cruise missiles ya meta 1,600km (1,000 miles) shi lir aser Moscow aser danga Russian yimtittem nunga maktettsü.

Trump aser Putin na phone ajanga jembidang US-i Ukraine nem Tomahawk missiles agütsütsü indang mejembi, ta Trump-i Brehostibarnü ashi. Ukraine-i iba missiles meshiba indang asündangba mapang, "Unites States atema Tomahawks ya nungdaker. Asen linük asoshi ajema mekumdaktsütsü," ta Trump-i langzü.

Putin-i iba ama missiles tem Ukraine dang ayongba ajanga rara jenjang tasen kati aitsü, ta shia liasü, aser Trump-i hopta tatemlen ang iba atema bilemdangtar ta shia liasü.

"Ni Putin den jembitsü akok aser 'Iba rara ya tatem kati marura ni parnok dangi Tomahawks yoktsü' ta ashitsü," ta Trump-i osangbener dang shia liasü.

"Tomahawk ya hadir tajung lir, kanga tesashi aser Russia menügdaker."

"Asüng Tir Trump den senden ka amentsü renema lira ser Middle East nung kiralongra azüoka aser rara tembangdaksüba nung takok anguba yimya yagi Russia-i Ukraine nung raraba tembangba nunga yaritsü imlar," ta Zelenskyy-i social media X nung zülua liasü.

## Madagascar mitkar leniri Gen Z longkak aiter dang pelaba lemsatep

**Antananarivo, Mongputeni/Oct. 17 (Agencies):** Mitkar temi Madagascar sorkar atsüngdoker anogo ishika lir Col Michael Randrianirina ya tir tasenba ama tezüngzüktep agiogo.

Tir Andry Rajoelina linük nungi jena oa pa mapa nungi atsüngdoktsüsa yimdong nung hopta aika longkak aitiba lanurtem dang pai pelaba lemsatepa liasü.

Tezüngzüktep sentong ya linük yimtiba, Antananarivo nung aliba Constitutional Court nung agia liasü, kong longkak aitiba nung lenirtem densema nisung telok tuluka adenshia iba sentong repranga liasü.

"Tanü ya asen linük asoshi otsüsütsü anogo ka lir. Melenshitsü tejangraba nem anidaktsür nüburtemi bhukuma asenoki asen linük indang

takum nung chapter tasen ka pelashishia lapoker," ta pai ashi.

Taoba mapang France nung kübok aliba linük ya 'transition period' kati ayaoka ayir, kong yimtenren tsütsü tetsükdaktsü agi sünga lir aser ozüng tsütsüa tejangja lenmang maka, aser Col Randrianirina lenisüba nung temulung alemer.

Madagascar tensa ya mitkar temi tashiyim amshia sorkar atsüngdokba lir ta linük balalai jembiba atema Constitutional Court tir Florent Rakotoarisoa-i aitsü.

Pai Madagascar indang constitution nung aibelenba meliasü ta pai ashi aser constitution ajanga tensa tamajungba ang kumdaktsü ta tenüngen asen.

Rajoelina-i mapa nungi anena democratic transition tajungba nung agitettsü asoshi

lenmang lapoktsütsü longkak aiter temi imlaa liasü.

Ajisüaka pai tir tashi nung akang-akanga amita par sorkar anentsü aser nisung telok balala den senden mena liasü, saka longkak aitertem memesüzüktet.

Longkak aitiba ya taoba ita tenzük aser mezüngbo power aser tzi agi anungba tejashi nung Gen Z Mada ta sür lanur movement kati ayongzükba liasü.

Col Randrianirina ya Madagascar indang elite CAPSAT army unit indang tekolakba liasü aser Mongulbarnü par sepaitema longkak aitertem den dena liasü.

Pai Gen Z longkak aitertem dang linük yimten tashi pai agir aser mitkar temi sorkar ka kumteta küm ana tsünga elections agitsü ta shia liasü.

## MULUNGNEN O



Tasoba :  
05.01.1984

Tasüba :  
08.10.2025

Onoki kodanga amatsü makokba temeim kinungtsü **Asür Kerentila** (Chuchuyimlang) ajungben iba akumli wadang doktsür aoba mapang ozü shisabulu aser tako mangyim nüktzü agi sünger alidang kija-kibong, arogo aser lokti balala nungi shirnokisa nübu, rongsen, shisatsü aser sarasadem agi onok mulung sunepja yaritepogo, nenok ajak dang kanga pelaba lemsateper. Tsüngremi nenok takum aser kibong moajang ta onok tamang sarasadem.

*Temeim Kinungbo, Jabaso aser Kinungertem.*

## Sorkar indang charter tasenba mechi Dhaka nung rongrong adok

**Dhaka, Mongputeni/Oct. 17 (Agencies):** Bangladesh interim government indang political charter tasenba nung temulung masüba lemsateptsü asoshi Parliament kima adenshia alibameindoktsü asoshi police temi tear gas khaloktsü, grenades aser süng amshia liasü.

Gen Z longkak aitiba ajanga taoba ato kilonser Sheikh Hasina atsüngdoker küm ka dak tema lir iba charter ya yanglua liasü.

Hasina atsüngdoka longkak aiter ta parnok sasa ashiba nisung noklang aika Hokulbarnü nungi tenzükba longkak aitiba sülen rongrong ya adok. Hasina anema nüburtemi longkak aitiba mapang parnoki meima aliba nisungtem takum tenla agüjaka charter tasenba nung parnoki aginüba ama masüba yong tejashi lemsatepa liasü.

Bangladesh yimtiba Dhaka nung longkak aiter kari police indang gari ka aser süki kar raksatsü aser kar sepaitem aser security ketdangsür den raratepa liasü. Iba mapang nisung kar yiru ta tenük kuli alirtemi ashi.

Yimtenren tsütsü temelenshi balala asoshi lenmang lapoktsü atema political charter tasenba nung meyongnem agütsütsü asoshi Novel Peace Prize angur Muhammad Yunus-i aniba interim sorkari linük nung political party tulutem jaoka liasü.

Taoba küm July ita sorkar anema tenzükba tenüngen agüja aliba "July National Charter" nung constitution melenshitsü, ozüngen melenshitsü aser ozüngen tasen yanglutsü atema shia lir.

Hasina'er Awami League party dak alaka political party tulu tem den jembishinü akaba sülen iba charter yanglutsü atema Yunus sorkari National

Consensus Commission ka tenteta liasü.

Taoba ato kilonser Khaleda Zia-i aniba Bangladesh Nationalist Party aser iba mesük tangatetba sako aliba party temi iba charter nung meyongnem agütsütsü ta shia liasü.

Hasina yimsüsüba mapang yimten tsütsü la anemertem aika apuba aser tepsetba densema nisung meimchir temeden anema inyakba kanga liasü.

Hasina yimsüsüba anema longkak aitiba ya July 1, 2024 nung tenzükba university nung azünger temi sorkar mapa nung quota system melenshitsü khanga liasü. Aser August 5, 2024 nü longkak aiter meyerijang aika Hasina aliba kidangi nungboka yia la helicopter nung India-i jena aoba sülen iba longkak aitiba ya anen. Hasina ya tang tashi India nung jenoka lir.

Nisung meimchir anema mapa tamajung inyak ta tai tonglokja tang ken o tejembidak aliba nung la adentsü court-i totuyuba agüja aliba sülen lai manidaker. Taoba küm hopta ishika longkak aitiba mapang nisung 1,400 shi tepseta alitsü südi ta United Nations-i ashir.

Yunus-i national election ya Muslim nung timba aliba linük nung nisung 170-i Islam yimsü nung temeshi Ramadan ita mamungdang February ita nung agitsü nanzükba lir. Ajisüaka elections nungya Hasina'er party aser parnok den sendaktepa alirtema shilem agidaktsütsü asü masüar mejangja.

Bangladesh nung Islamist party tulutiba, Jamaat-e-Islami ya charter nung meyongnem agütsütsü asü masüar telemtetba magi aser kaketshir-i anir aliba National Citizen Party-ibo shilem magitsü ta ashir.

# 5th All Nagaland Dr. Imkongliba Ao Memorial Volleyball trophy MH-10-i akok



DDSC Stadium Dimapur nung Japukong Youth Organisation-i ayongba 5th All Nagaland Dr. Imkongliba Ao Memorial Volleyball trophy champion team MH-10 nungi asayartem aser iba sentong shibangtsür Deputy Chairman, Dimapur Municipal Council, Imlinaro Stephanie Ezung noksa nung angur.

**Dimapur, Mongputeni/Oct. 17 (TYO):** Japukong Youth Organisation ajanga DDSC Stadium, Dimapur nung ayongzükba 5th All Nagaland Dr. Imkongliba Ao Memorial Volleyball trophy final Hokulbarnü asayaba nung MH-10-i Changtongya Volleyball Association (CVA) madak takok ngua iba asayamung takok marok bener ogo.

MH-10 ya taoba küm iba asayamung nung Runner-Up liasü aser parnoki straight sets 25-19, 25-21, 26-24 nung

defending champion Changtongya Volleyball Association akok. Iba asayamung akokeri senpet sen 1.50 lakhs den trophy aser kulizüng kaket angu aser Runner-Up nem senpet sen 80,000 den trophy agütsü.

United Changki-i tasembuba jenjang tongteta senpet sen 40,000 ngua liasü.

Iba asayamung nung Best Spiker ya MH-10 nungi Watinuken liasü aser pa nem senpet sen 10,000 den kulizüng kaket agütsü, Best Setter ya

CVA nungi Limatenzuk-i ngua senpet sen 10,000 den kulizüng kaket agütsü liasü.

Maneni Player of the Tournament ya CVA nungi Bendangtemsü-i angu, shibai senpet sen 10,000 den kulizüng kaket agizüka liasü.

Iba asayamung nung team toku-i shilem agi aser anogo asem asaya liasü.

Asayamung tembangba sentong Deputy Chairman, Dimapur Municipal Council, Imlinaro Stephanie Ezung-i moaja aden.

# 27 Buba MDFA Trophy pezünübuba anogo osang



Thunderbolt FC aser Doyang Strikers MKG asaya mapang tangokba noksa nungji angur.

**Mokokchung, Mongputeni/October 17 (TYO) :** 27 Buba MDFA Trophy tanü Imkongmeren Sports Complex Mokokchung nung pezünübuba mezüngbuba asaya nikongdang 1:00 ako nungi Telongjem FC aser Intermingla Club asaya aser tanabuba asaya 2:30 ako nungi Thunderbolt FC aser Doyang Strikers MKG tsüngda asaya liasü.

Tanu mezüngbuba asaya Telongjem FC aser Intermingla Club asaya nung telok katia

goal meyocteti asaya 0-0 nung tembang.

Thunderbolt FC aser Doyang Strikers MKG tsüngda tanabuba asaya nung asaya tenzükli minute 8 buba nung Doyang Strikers MKG nungi J.no-10 Horan-i goal-1 yok aser iba sülen mapang agi atong nung anisüngzükba mapang agi. Telok ana tanaben ground-i aita asayaba mapang Doyang Strikers MKG nungi minute 52 buba nung J.no-8 Toka Achumi-i goal-1

yok, minute 58 buba nung J.no-15 Ganghui-i goal-1 yok aser ano minute 67 buba nung J.no 9 Horan-isa goal-1 yokteta Doyang Strikers MKG teloki goal 4 jagi Thunderbolt FC ayong ayonga koka liasü.

**27 Buba MDFA Trophy 18-10-2025 Fixture**  
12:00 pm Sports Society Soyim Vs. Team Gilgal  
1:30 pm Super Seniors FC Vs. Intermingle Club  
3:00 pm NU, Lumami Vs. Doyang Strikers MKG

# Tanü 25th NSF Martyrs' Memorial Trophy final asayatsü

**Kohima, Mongputeni/Oct. 17 (TYO):** Naga Students' Federation aser Angami Students' Union lungjemer ayongzükba 25th NSF Martyrs' Memorial Trophy final Honibar nikongdang 4:30 ako nungi asayatsü.

Final match ya Indira Gandhi Stadium Kohima nung Chedema Village Youth Organisation aser Nagaland United Sporting Club tsüngta asayatsü

Chedema Village Youth Organisation ya iba asayamung tepiyong khenyongi form tajung nung asayayonga arua liasü. Parnoki mezüng round nung Amigos FC Tesophenyu madak 7-0 agi akok, tanabuba round nung Kidima Farmers United madak 2-0 agi akok, tasembuba round nung United Brothers FC madak 7-1 agi akok aser pre-quarter nung

Rever Gantok SC madak 4-0 agi akok, quarter final nung 2-1 agi Tangkhul Katamnao Saklong tsükdaksü aser semi-final nung 2-1 agi Sechü Zubza FC madak takok ngua liasü.

CVYO-i taküm iba asayamung nung goal 24 agütsü aser parnok goal asem achi.

Mezüngbuba Nagaland Super League 2024 nung second runner-up, Nagaland United Sporting Club ya pre-quarterfinals nungi indang-indanga asaya tenzü.

Parnoki Dimapur Chaos madak 7-0, quarter final nung Mao Students' Union madak 2-1 aser semi-final nung Anal Lenruwl Tangpi madak 4-0 agi takok ngua liasü.

Nagaland United Sporting Club match asem asayaba nung goal 13 agütsü aser parnok goal ka chir final atong.

# Denmark Open: Lakshya Sen, Satwik-Chirag nungeri takok angu

**Copenhagen, Mongputeni/Oct. 17 (Agencies):** Denmark Open badminton asayamung nung India nunger badminton asayartem maneni takok nguyonga Brehostibarnü kija aser tarep asaya nung takok ngua liasü.

Lakshya Sen-i taküm asayamung balala nung shilem agiba rongnung tajungtiba asayateta Denmark nunger World No. 2 Anders Antonsen madak straight games nung takok ngua tepur kija asaya quarterfinals tongogo.

Arishi küm 23 tain India nungbai yimya balala amshia

kanga junga asayateta Antonsen madak 21-13, 21-14 agi takok ngua liasü. Sen-i asaya tetenzük nungi kanga junga asaya amokbanga liasü.

Maneni kasa asayamung nung India nunger tebur tarep asayar Satwiksairaj Rankireddy aser Chirag Shetty nati Chinese Taipei nunger Lee Jhe-Huei aser Yang Po-Hsuan madak straight-sets nung takok ngua quarterfinals tongogo.

India nunger tarep asaya nung World No. 1 Rankireddy-Chirag nati 21-19, 21-17 agi takok ngua liasü.

# Assam nung Anti... Tapak 1 nungi...

Iba mapa ya yimtsüngtem aser public awareness maliba tesemtem nung inyaker. Ano kijatem meyong tea estates nung jenjang dalang agi temang anepalunür aser ibala tesem nung taila doctor temi tajangzük agir ta paisa ashi.

Nija meyong tea estates nung senotsü kümzüksü atema taila doctor tem amshir. Parnok ya Plantation Labour Act kübok medical requirements ajanga alenbanga mali ta Dr. Neog-isa ashi.

Iba mapa ya Assam kübok yimtsüngtem nung kanga bulur saka Guwahati, Dibrugarh, Silchar, aser Nagaon ama urban centers nunga lir.

Taila doctor kar private hospitals aser nursing homes nung inyaker. Silchar nung

taila doctor kati obstetrics aser gynecology (O&G) specialist ka ta shia surgeries agiba putetdang ketdangsurtem kanga aoksatepogo.

Anti-Quackery Cell-isa sorkari meyong healthcare schemes aser Mobile Medical Units nunga taila doctor tem bushitetogo.

Ibala doctor temi public ashioksütsü mapa balala inyaker. Kari medical degrees tiyazü yanglur amshir aser kari chichiba doctor tem indang identities aser registration numbers amshir.

Nübortem lendong nungi jenbua alitsü atema National Medical Commission ajanga renemba Indian Medical Register nung doctor tem osang jangiateptsü ayongzükter ta Dr. Neog-i ashi.

**BILEMDANGANG**  
"Mangdang malidak teimla malir."